

Date – 06/02/2025

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. **Governor Gen Vijay Kumar Singh-an vawiin khan Aizawl Khatlaa 23 Sector Assam Rifles Headquarters tlawhin Assam Rifles hotute a kawm.**
2. **Higher & Technical Education Department Secy Pu H. Lalengmawian Mizoram State University dinna tur bill tun Budget session-ah pharh hman tum a ni a ti.**
3. **Mizoram leh Assam state inkara a tul anga thawhho dan tur leh inhriatthiam tawna tha zawk neih theih nan vawiin khan state pahnih aiawh te an inbia.**
4. **Prime Minister Narendra Modia chuan sawrkarin hmasawna a kalpui danah ram leh hnam a hmasa berah tih thupuiah a nei a ti.**

<><><>

### GOVERNOR

**Governor Gen (Retd) Vijay Kumar Singh-an vawiin khan Aizawl Khatlaa 23 Sector Assam Rifles Headquarters tlawhin Assam Rifles hotute a kawm.**

**Governor chuan India leh Myanmar ramri vengtu Assam Rifle-te hmalakna fakawm a tih thu sawiin, India ram leh a chhunga chengte himna tura theihtawp chhuah chhonzawm zel turin a chah a. Dan lova ramri kaltlanga chetna ven kawngah tanlak a tul thu sawiin, mipuite rawngbawl hna thawh pawh ngaipawimawh zel turin a chah bawk.**

**He hunah hian Larsap hi guard of honour pek niin, 23 Sector Assam Rifles HQ DIG Brig Girish Upadhya, Aizawl leh a thawhpuite'n an lo dawngsawng a. Mizorama Assam Rifle hmalakna leh pawimawh hrang hrangte an lo hrilhfiyah a ni.**

**Assam Rifle-te hian Mizoram bikah hian India leh Myanmar ramri 510 Km vela thui ven hna an thawk mek a. 23 Sector Assam Rifles Hqrs. Khatla, Aizawl hnuaiah hian Battalion 3 a awm a. Battalion tinah Company Operating Base (COB) 6 zel awmin, Indo-Myanmar border ven hna ngawrh takin an thawk mek a ni.**

<><><>

### VC/LC ELECTION

Karleh nilaini-a Village Council leh leh Local Council inthlan vote thlak anih tawh avangin, political party ten theihtawp chhuahin vote an zawng zui zel a, campaign pawhin a vawrtawp a thleng chho tan.

He inthlan neih turah hian, Party hrang hranga Village Council Election a candidate zawng zawng zat hi 6830 an ni a. General seat ah 5258, reserve seat ah 1674 a vaiin 6932 a ni a, candidate inhnukdawk 102 an awm a ni.

Local council Lunglei Municipal Council leh Aizawl Municipal Corporation ah hian candidate 2076 an awm a ni.

Local Council Aizawl Municipal Corporation ah candidate 1659 awmin, general 1211 leh reserve 448 an awm a. Local council Lunglei Municipal Corporation ah candidate 417 awmin, general 309 leh reserve seat ah 108 an awm bawk a ni.

ZPM Election Committee Chairman leh ZPM General Hqts Vice President Pu VL Zaithanzama, chuan ZPM candidate general leh reserve seat ah 2371 an neih thu a sawi a. Vawiin thlengin an party ZPM ah chuh lohva tlinga puan candidate 29 awmin, heng 29 zingah hian general 17 leh reserve 12 an awm a ni.

Heng bakah hian party dang chuhlohva tlinga puan an awm bawk a, MNF atangin candidate 5, INC atangin candidate 4 leh independent candidate atangin 2 an awm a, chuhtu awm lova tlinga puan zat hi an vaiin 40 an ni.

<><><>

## MIZORAM STATE UNIVERSITY BILL

Higher & Technical Education Department Secy Pu H. Lalengmawia chuan Mizoram State University dinna tur bill buaipui mek a ni a, tun Budget session-ah hian sawiho tura pharh hman tum a ni a ti.

Vawiina Pachhunga University College Mizo Department-in ‘Thangliana Kutchhuak leh Sulhnu Zir Chianna’ an buatsaih a hmanpuinaah he thu hi sawiin, Pu H. Lalengmawia chuan, NEP 2020 ah kum 2035 hnu lamah Affiliated College awm phal a nih dawn tawh loh avangin, tuna Mizoram University hnuiaia college te an awm ang hian an awm thei tawh dawn lo tih a sawi a. “State sorkar chuan sum harsa chung chung pawhin state university din turin ruahmanna a siam mek a, a bill pawh peih a ni tawh a ni,” a ti a. State university hi a hautak lo thei ang berin, Clustered University-a din tum a nih thu a sawi a. College leh institution hrang hrang te chu hman tangkai tum a nih thu a sawi bawk.

Pu H. Lalengmawia chuan kum 2019-a Prime Minister-in a thua a hawn tawh, Mizoram Engineering College pawh central-in a rawn nawr nasat tawh avangin, kum 2026 session-ah chuan, subject pali velah a taka class tan hman tum a nih thu a sawi bawk.

<><><>

## PACS

Tunlai hian Primary Agriculture Credit Society (PACS) dinhmun enfiahin Mizoram hmun hrang hrangah Resource person te an kal kual mek.

Apex Bank hnuiaia awm PACS Development Cell leh Bussiness Diversification & Product Innovative Cell (BDPI)-a Resource Person Pi Lalhruaichhungi sawi danin Mizoramah PACS 90 din a ni tawh a, heng zinga Society 25 chu tun dinhmunah a tha a ngaih niin PACS hi pawisa dah that nan leh loan pek nan a tangkai a, thingtlang khuaa awm te tan awlsam takin sum

sen ngai lova din theih a ni a, kuthnathawk leh sumdawna khawihtute tan a tangkai takzet tih a sawi.

Pi Lalhruaichhungi chuan PACS in loan a pek chhuah bakah sumdawna kawng hrang hrang an khawih thei a ti a, FCS &CA depts hnuai ah buhfai sem retailer chenin an khawih thei a, society member leh mipui tan tangkai takin hna an thawk thei tih sawiin intodelh nan India sorkar in a ngaih pawimawh avangin mipui ten PACS chu din uar a hmang tangkai zel turin a duh tih a sawi bawk.

<><><>

## CACHAR-KOLASIB

Mizoram leh Assam state inkara a tul anga thawhho dan tur leh inhriatthiam tawna tha zawk neih theihna atana pawimawh thil chi hrang hrang vawin khan state pahni aiawh ten an sawi ho a.

Cachar DC Conference Hall ah Mizoram aiawhin Kolasib DC, Pu Robert C Lalhmangaiha leh Kolasib SP Pu David H Lalthangliana te an kal a, Assam aiawhin Cachar DC, Pu Mindal Yadav leh SP Pu N Mahato te an tel a ni.

He hunah hian Kolasib DC chuan Mizoram in VC inthlan an hmachhawn turah ramri leh a chhehvel ah dan leh thupek kenkawhna lamah a tul anga thawhpui turin a sawm a. Inunauna tha zawk a awm theih nan Kumin Chapchar kut lo thleng turah pawh Kolasib a hmanpui turin a sawm nghal a ni.

Heng bakah hian NHIDCL hmalakna a 4 lane kawngpui laih tur chungchang sawihovin Kolasib ah meeting neih nise anti a, state pahni ramri hnaih a cheng te harsatna an tawh loh nan leh thlamuang taka an awm theih nan Minister level a inbiakna a joint resolution anlo siam tawh chu vawng zel chungin a tul anga thawh dun zel nise anti bawk. He hunah hian Pu David H Lalthangliana, Kolasib SP pawhin Cachar SP leh a hoten Mizoram Police te kawng hrang hranga an thawhpui ah lawmthu a sawi a, hun lokal lehzel ah pawh thawhdunpui turin a sawm nghal bawk a ni.

He hun hi nikum August ni 9-a State pahni Home Minister ten Assam leh Mizoram ramri ah inpawhna leh thawhhona tha zawk a awm theih nan, DC leh SP level ah inbiakna neih thin ni rawhse tia an thu dah bawhzuina a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## ROAD SAFETY MONTH

Mizoram Road Safety Council thuthlukna angin tunthla chhunga kalpui turin Road Safety Month Mizoram chhung district hrang hrangah kalpui a ni.

Aizawl ah chuan traffic point hrang hrangah leh kawthler kawi tinah uluk leh zuala traffic police te duty awmin lirthei khalhtu leh lirthei veivak te an him theih nan kawng hrang hranga hmalak a ni a. Lirthei khalhtute leh lirthei dinhmunte pawh endikna a tam thei ang berin neih a nih tur thu traffic hotute chuan an sawi.

Road Safety Month hman a nih chhung hian Digital Media kaltlangin entute mit la thei ang tura inzirtirna video clip leh animation te siam a ni dawn a. Hetih hun chhung hian kawngpui chhe zual leh him lo lai te pawh en dik tum niin, lirthei hralhchhuaktute pawh fimkhurna kawnga an mawhphurhna te hlenchhuak tura hriattir leh ngen an ni.

Addl SP Pi Sarah Lalrinkimi thusawi lo ngaithla ang.

Tukin khan Champhaia CHANEM Building-ah Road Safety Month hi Champhai Bawrsap, District Level Road Safety Committee Chairman ni baw k Pu VL Remliana a hawng a.

He hunah hian Zoram Drivers Union aiawha thusawitu Pu K. Lalrinmawia chuan lirthei khalhtute chu kawngpui hmang ve midangte ngaichang chunga motor khalh thin tur leh flawmngaihna vawng nungtu ni zel turin a ngen baw k a ni.

Road Safety Month 2025 thupui atan hian 'Fimkhur leh him takin lirthei khalh thin ang che' tih hman a ni a. Hawna hunah hian Road Safety Month pualin thutiam lak a ni baw k.



## DIG(NR) VISIT MAMIT

DIG Northern Range Pu C Lalthanmawian wawin khan Mamit SP office tlawhin chanchinbu mite a kawm baw k a.

Pu C Lalthanmawia chuan police chu mahni chauh a ding theikan ni lo a, mipui vantlang, flawmngaipawl leh chanchinbu mite nen thawhona tha neih a tul tih sawiin an ni tel lo chuan hmasawna tak tak a awm theih loh thu a sawi.

He hunah hian Mamit MJA te chuan district harsatna leh police hnen atang a district ralmuan zel nan a tul an tih ang te an thlen a ni

Mamit SP Pu Pukhraj Gupta chuan Mamit police hnathawh tawhte a tarlang a, he hunah hian rukru avanga phone tibo, police in an man te hnenah phone pek let a ni a, phone pariat an man chu a neitute hnenah pek let niin hemi kawng a hmalatu CEIR team te hnenah chawimawina certificate pek an ni baw k.



## PM

Prime Minister Narendra Modia chuan sawrkarin hmasawna a kalpui danah ram leh hnam a hmasa berah tih thupuih a nei a ti.

(Byte)

Vawiina Rajya Sabha-a President thusawi chungchanga lawmthu sawina motion sawihonaah he thu hi sawiin Pu Modia chuan mipuiten he hmasawna

model an kalpui hi an enchhin a, an hre thiam tawh bawk a, an thlawp zui a ni a ti a. Hei vang hian a sawrkar chuan a zawna a term thum nan thuneihna an pe ta a ni a ti bawk.

PM Modia chuan sawrkarin ST leh SC te venhimna dan ti chak turin hma a lak thu a sawi a. Hei bakah hian hnam hnuaihnhung zawkte hamthatna tur a ngai pawimawh hle tih sawiin mahni nihna inthlak transgender te dan anga humhimna pawh an sawrkar chuan tha takin an nei a ti a. OBC ten hun rei tak an lo phut tawh ram danpui hnuaiia OBC Commission kalpui pawh tihhlawhtlin a ni tawh a ti bawk.

<><><>

EAM

External Affairs Minister Dr.S.Jaishankar-a chuan ramdanga dan kalha pmlut rawn thawnkir chu khawvel ramte inremna thuphung anih thu sawiin dan dik taka thiltih chu ram tin thatna tur a ni a ti. USA atanga dankalha pmlut India mi rawn thawn haw an nih chungchang vawiin khan Rajya Sabha-ah sawilangin Pu Jaishankar chuan sawrkar tan chuan an mi leh sa dankalha ramdanga awmte hruai kir chu an mawhphurhna anih thu a sawi a. Union Minister chuan hetianga inhruaikir hi a vawikhatna anih loh thu sawiin sipai thlawhna leh civil thlawhna pawh hman thin a ni a ti bawk.

Hetihlai hian opposition te chuan US atanga India mi thawn haw an nih chungchangah hian sawrkar an bei nasa hle a ni.

<><><>